


# 宋詩紀事

六十一至六十三



			書門
三	一	三九六	類
二	二	六	函
冊	架	五	號

內閣文庫		
三	三	漢
六	九	書
三	六	
冊	五	
架	號	類

內閣文庫		
番號	漢	3965
冊數	32 ( 22 )	
函號	363	123

廿二



宋詩紀事卷六十一

錢唐厲文庫輯

臨潼張四科  
江都閔華  
勘定

鄭性之

性之字信之初名自誠福州人嘉定元年進士第

一理宗朝累官寶章閣待制知樞密院參知政事

出知福州鵝按咸淳臨安志自誠為嘉定元年榜首宋史作四年誤四年榜首趙建大也今訂正


落梅

夜來幾陣隔窗風便恐明朝已掃空點在青苔真可惜不

如吹入酒杯中

後村千家詩

章樵



樵號峒麓昌化人嘉定元年進士歷官知漣海

授朝散郎知處州卒

伽溪 在昌化縣

試將生計問農家兒大扶犁女漚麻燒筍鬻葵供午餉山

中樂事自無涯 杭州府志

諸葛興

興字仁叟會稽人嘉定元年進士為彭澤奉化兩

丞嘗作會稽九頌有梅軒集

曹娥祠

瞻靈祠兮江之湄懷予心兮肅祇表卓行兮尚之祀垂妙

辭兮淳之碑嗟窈窕兮踐天性一念烈兮萬古鏡山眉兮

蒼蒼江練兮茫茫江之水兮可竭娥之靈兮不可滅 會稽續志

杜範

範字成之黃巖人嘉定元年進士端平中拜監察

御史累遷禮部尚書淳祐二年拜右丞相卒贈少

傅諡清獻有集

戊辰冬和湯南萬韻

春初走京華秋杪歸舊廬簡編廢已久開卷澀且疎誰能

擊其蒙石田或可腴雁山有佳士讀盡天下書足跡半九

州不憚道里迂陋邦何足臨而亦來我居相從一樽酒未

厭園中蔬笑談欣有合浩若縱壑魚人生惟所適所適各

有途胸中苟不迷到處皆通衢簞瓢有真樂顏氏何其

沒沒嗟我生未知終焉圖論交須論心所論在不渝厚  
示一語令我反三隅君無金玉音請誦一束芻

良月遊水樂

久矣聞水樂邂逅作此遊林立攢萬石曲徑穿深幽徐衍  
開古洞下有清淺流惜哉非古音噴薄皆人謀流觴飲山  
淥風鬢吹颼颼欲歸興未盡攜手湖上樓斜陽獻萬狀浩  
以雙目收白鳥去復還翩翩良自由我本山林人對此多  
慚憂歲月不我與宴閑其可偷便作合歸計老矣安所投  
世事皆漫爾政恐空白頭

和澧州喜雨韻

秋色在何許浮嵐疊翠閒江清雙鳥渡天闊片雲閑雅量

肩文舉新詩壓子山更深聽遠溜哦詠苔潺湲

送湯仲熊國正以直去國

朔風翦木末碩果懸孤危邈矣冥飛鴻異哉聞鳴鴟莫雲  
結愁陰送君江之湄去者挽莫畱畱者良自悲何當謝塵

鞅鼓柅相追隨

以上杜清獻公集

薛師點

師點鄞人嘉定元年進士

酬荅張安撫伯玉先生

寡交率天性積疴攻妙藥干祿念烝嘗著書恣談謔永矣  
離畏途何況縻好爵感子故人意屏吏延鈴閣時剖千秋  
心兼訂三山約風流張平子文采謝康樂潛魚媚幽潭高

鳥呢林薄物類既參差天地亦寥廓但愁霜霰多石出兼

水落甬上耆舊集

### 洪咨夔

咨夔字舜俞於潛人嘉定元年進士理宗朝累官  
刑部尚書翰林學士知制誥加端明殿學士提舉  
萬壽觀卒諡忠文有平齋集鶚按咸淳臨安志有嘉定元年鄭自誠榜無二年榜宋史誤今

訂正

仇遠碑史洪平齋新第後上衛王書自宰相至州縣無不摺據其短大概云昔之宰相端委廟堂進退百官今之宰相招權納賄倚勢作威而已凡及一職必如上式俱用而已二字時相怒十年不調洪有桃符云未得之乎一字力祇因而已十年閒

### 贈石室朱修行

響泉一派落天風人在浮雲柳絮中亭午柴扉猶未啟碧

玲瓏底拒霜紅

### 直玉堂作

禁門深鎖寂無譁濃墨淋漓兩相麻唱徹五更天未曉一

池月浸紫薇花

### 題東山

在臨安縣西三里相傳謝安石高臥之地

金堂玉室舊相羊被髮依然下大荒風送嬋娟飛落葉雲  
移縹緲溼疎篁桓伊箏外深情酒幼度棊邊定力香萬事  
古今開闔眼樓頭吹面水風涼

### 天目山招隱歌

雲氣斂兮天目之巔濤江綫橫兮海門濺濺扶桑子半兮  
陽鳥翻可俯而掬兮嚙以天井無聲之泉子其隱乎吾與

子兮拾荃

正月十九日孟享從駕

黃繖中開一點紅繡雲鹵簿海棠風鈞容聲出雲霄外馬  
上誰憐有老龔

壬辰小雪前奉親游道場何山

何山如幽人道場如大家穰穰衲子腳刺刺騷翁牙挾雋  
控寒飈披光躡晨霞危顛矯窄堵平疇畧汗邪巖泉跑虎  
湧徑松髯龍拏鐘梵破深寂金碧開芬葩修廊步履峻傑  
閣望眼賒山勢佩玦矗湖光鏡險訝清節杳靄入古弁空  
濛遮列翠不可唾羣籟無敢譁坐我梅檀林酌之槍旗茶  
宇定岫出雲語妙天雨花吾生久墮甌昔遊慣乘槎夷猶

廬阜陽宿畱岷江涯高曾畱嶠棧卑或搜崖窪舊夢難歷  
省此行足雄誇老親八十健閑儔二三佳拍浮一葉渺收  
覽萬景奢富貴上蔡犬貧賤東陵瓜未須笑落鐸誰能苦  
簪沙候門占噪鵲旋橈趁歸鴉奇事恐沒沒舉詩屬僧伽

感王荆公事

君臣一德盛熙寧朕故趨新用六經但怪畫圖來鄭俠何  
期奏議出唐垌掌中大地山河舞舌底中原草木腥養就  
禍胎身始去依然鍾阜向人青

以上平齋集

梅磻詩話荆公行青苗免役等法引用一筭小人天下受其苦卒名六十  
年後靖康之禍洪平齋有詩云按國史俠嘗從安石學垌乃安石所薦  
皆以新法不便攻之此詩乃五十六字史論

都城火

九月丙戌夜未中祝融漲焰通天紅層樓傑觀舞燧象綺  
峯繡陌奔燭龍始從李博士橋起三面分風十五里崩摧  
洶洶海潮翻填咽紛紛釜魚死開禧回祿前未聞今更五  
分多三分大塗小撤噤不講拱手坐視連宵焚殿前將軍  
猛如虎救得汾陽令公府祖宗神靈飛上天痛哉九廟成  
焦土

梅磻詩話紹定辛卯臨安大火九廟俱燬獨丞相史彌遠賜第以殿司軍  
救撲而存洪平齋哭都城火詩云云末意規諷時宰甚切聞之者足以戒

吳泳

泳字叔永號鶴林潼川人嘉定元年進士理宗朝  
仕至起居舍人兼直學士院權刑部尚書終寶章  
閣學士知泉州有鶴林集

嘉熙丁酉七月上澣遊大滌題住山龔冲妙良泓軒  
舊與清泉白石盟身閑方作洞霄行青山延客元無鎖碧  
澗流花似有情古洞欲隨仙隱去高岡終待鳳來鳴道人  
喚我松間飲坐拂寒雲月未生

洞霄詩集

沈大椿

大椿嘉定中真州判官

自維揚回真州

一官安敢問青瓊形影相看祇自憐黃鵠已登青漢去白  
鷗空占淺沙眠杏花開徧揚州雨柳色渾鋪瓜渚烟老眼  
生疎堪自笑浪驚風物向淮天  
青蒲短短柳斜斜入眼新愁亂莫遮雨潤固應宜筍蕨風

龔端不貸鶯花春來止酒常因病客裏逢人祇問家安得  
扁舟下荆水一歸老我舊生涯

惟揚志

胡榘

榘字仲方廬陵人銓之孫嘉定中官工部尚書出

知福州

嘉定二年秋重遊洞霄

重尋九鎖躡丹梯回首空驚歲月移風虎守關寧易到冰  
龍候路卻先馳松筠老去俱全節猿鶴迎來盡故知更拂  
棲真洞閒石弟兄同記勝游時

餘杭泉石欠幽探淨拂衣塵入翠嵐九鎖山門雲上下一  
峯天柱殿西南元封舊事無人記德壽仙游有客談痛飲

丹泉臥磐石松風滿耳夢初酣

洞霄詩集

句

自孤花底三更月卻怨樓前一笛風

落梅 鶴林玉露

呂午

午字伯可歙縣人嘉定四年進士歷官浙東提刑  
監察御使遷起居史院官卒贈華文閣學士有竹

坡類橐

馬城花窠

寓居臨安馬城作

老子西城住今踰十載期栽花成茂樹種柳長高枝移接  
從渠巧誇傳到處知擔頭挑賣去一一是趨時

竹坡類橐

和岳王廟壁上韻

和間西一舍有菴曰東松紹興初岳鄂王提兵經  
吾郡西上士卒秋毫無犯卒偁人門外足不敢一



越限內嘗思是菴留題

當年唯說岳家軍紀律森嚴孰與鄰師過村村皆按堵功  
成處處可鑄珉威名千古更無敵詞翰數行俱絕塵擬取  
中原報明主亦勞餘刃到黃巾

新安文獻志

徐文卿

文卿字斯遠號樟上玉山人嘉定四年進士與趙

昌父韓仲止齊名有蕭秋詩集

葉水心序云斯遠淹玩衆作凌暴偃蹇情瘦而意濶貌枯而神澤方于西  
江宗派斯又過之

游洞巖

跨馬絕風烟夜與雲俱宿彈琴向窗閒微月挂森木曉行  
巖上路一溪緣淨綠路窮入其中溪流貫山腹巖開類天

設石亂疑鬼伏水從何自來乃爾瑩心目巖前野僧居種  
桃滿空谷惜已過芳時不見花芬馥平生青霞志恥受紅  
塵辱老我茅三閒茲山疑可卜

前賢小集拾遺

偶題

綠樹何稠疊清風稍羨餘枕縈雲片片簾透雨疎疎修篁  
通泉壑殘碑出野鉏上陵知幾變耕稼雜陶漁

雨後到南山村家

衝雨入窮山山民猶閉關橋垂茅屋畔梅暎竹籬閒奇石  
依林立清泉繞舍灣吾思隱茲地凝立未知還

以上瀛奎律髓

周端朝

端朝字子靖永嘉人從朱晦菴武夷讀書登嘉定

四年進士官至刑部侍郎諡文忠

三江口

吳門臺北竹樓隅三日追陪漫叟居曉夢驚辭赤壁鶴夜  
棲看打武昌魚橫洲遙澈分燈影落月斜河運斗車回伏  
三江問漢口陸離蘭葉響環瑤

東甌詩集

程公許

公許字季與一字希穎號滄洲敘州宣化人嘉定  
四年進士理宗朝累官中書舍人禮部侍郎進權  
刑部尚書有塵缶集

牡丹

春工殫巧萬花叢晚見昭儀擅漢宮可惜芳時天不借三

更雨歇五更風

全芳備祖

黃子信

子信長泰人嘉定四年特奏名第二人調新會鹽  
場有散翁集

投楊帥

六年兩度拜宸旒換得青衫白上頭飛鵲祇因無樹繞窮  
後何暇擇林投明知著腳當來誤幾欲抽身不自由安得  
有錢了官債便無三徑也歸休

歸時作

笑倩西風拂舊埃歸時行李似初來也知三載清貧好博  
得一家強健回

漳州府志子信初調新會鹽場帥楊長孺以其老榜爲監當心易之常摺  
撫其簿書子信將拂衣而去因投以詩云云

周假菴

題趙千里夜潮圖

款書嘉定庚午仲夏一日

烟蒼蒼江茫茫明月夜挂天中央奔潮不盡當日恨金波  
怒捲虬龍長浦口秋飛揚鷗雁不眠聲周章風高沙漲望  
難到羽翰但逐潮低昂窗閒簾炷香開卷有素商何須八  
月上錢唐對此秋濤生錦囊

珊瑚網

袁甫

甫字廣微鄞人嘉定七年進士第一歷官吏部侍郎兼國子祭酒權兵部尚書卒贈少傅諡正肅

題陳和仲尊明亭

亭在山巔氣象巍然山從何來蜿蜒蜿蜒我坐亭上極目  
一望羣峯畢朝尊無與抗我撫亭下萬象難寫一一分明  
入我醜聲有時攜筇借我朋從莫知我心獨撫孤松

甫上者舊集

徐清叟

清叟字直翁浦城人嘉定七年進士理宗朝歷官  
廣東安撫使權兵部尚書拜端明殿學士知樞密  
院事兼參知政事提舉佑神觀出知泉州卒贈少

師諡忠簡

淨明院梅巖恭和高廟御製

偶因祀事訪丹霞寺古山深石徑斜衝凍細尋梅信息枝  
頭喜見狀元花

咸淳臨安志

贈建寧妓唐玉

上國新行巧樣花一枝聊插鬢雲斜嬌羞未肯從郎意故把芳容半面遮

豹隱紀談

陳耆卿

耆卿字壽老臨海人嘉定七年進士官至國子司業著有貧窗集赤城志

葉水心云陳君之作馳驟羣言特立新意險不流怪巧不入浮

艱食行

新穀未升除穀罄窶人托麥以為命今年種麥如去年去年滿屋今空田吁嗟皇天毋乃戾去年浙右當死歲湘中死寇淮死兵留得東州僅旒綴祗今艱食遽如斯豈是造

物有乘除我無一語活四海對之泣下徒霑裾催租官吏

如束溼里正打門急復急安得君眼如月長灼破田家蓑

與笠全芳備祖

王伯大

伯大字幼學號畱耕福州人嘉定七年進士理宗朝累官端明殿學士拜參知政事

贈戴石屏

詩老相過鬢已星吟魂未滅昔年清揮毫不著塵埃語盡

把梅花巧琢成梅磳詩話

丹青閣

傑閣峩峩倚碧蒼菊花時節此持觴市聲一段隔秋水橋

影半空橫夕陽挺挺霜筠排壑立涓涓石溜引山長人言  
絕頂多奇觀安得閑身宿上方

詩家鼎鑪

郭磊卿

磊卿字子奇仙居人嘉定七年進士端平初拜右  
正言尋擢右史以直言為史嵩之所忌除起居郎  
卒諡正肅有兌齋集

偶題

更無清興在杯觴不用蒲葵扇自涼月色靜時山鶴叫一  
庭清景藕花香

宋藝圃集

李劉

劉字公甫號梅亭崇仁人嘉定七年進士仕至中

書舍人直學士院寶章閣待制卒有詩文類藁

孫雲翼李梅亭先生小傳劉嘗從真德秀游西詞科文字而飲書室指竹  
夫人為題曰蕲春縣君祝氏可衛國夫人劉援筆立成末聯云於戲保抱  
攜持朕不忘乙夜之寢展轉反側爾尚形四方之風德秀擊節歎賞嘉熙  
己亥四月誕皇子告廟祝文劉以學士當筆以四柱作一聯云亥年己月  
無長蛇封豕之虞午日丑時有歸馬放牛之兆時方有蜀警人咸賞其中  
的有梅亭四六行世

記夢

壯志已違黃鵠下老身合占白鷗前夜來耿耿江湖夢秋  
水長天一釣船

前賢小集拾遺

聞笛

何處桓伊酒力雄分明嚼徵更含宮倚樓三弄西風急不  
覺梅花大半空

後村千家詩

項容孫

容孫字仲履號雲藪江陵人嘉定七年進士理宗  
朝官殿中侍御史

山中憶兄弟

鴻雁不成行飄零歲月長一身三處夢半夜九回腸積雪  
欺茅屋孤燈照錦囊何當聽夜雨卻話此淒涼

詩林萬選

吳昌裔

昌裔字季永號青蓮山人中江人嘉定七年進士  
理宗朝歷官知婺州加集英殿修撰以寶章閣待  
制致仕卒諡忠肅有集

攜客山行詠陶嘉月自雙徑來洞霄丹巖翠壑林立  
環擁神剗鬼刻不可名狀餐雲漱月偶得八吟畱之

山中以紀幽踐嘉熙三年三月穀雨

存三首

上界神仙住九華故畱靈鎖護烟霞雲根欲斷溪回處流

出山中幾片花

九鎖山

鑿破千年渾沌心石楠當戶洞愔愔詩臞猶怯春寒在捫

石梯雲不敢深

棲真洞

誰鑿巖扉石竇開懸崖飛瀑轉風雷須臾白浪從天下野  
客不知何處來

飛玉亭 洞霄詩集

吳淵

淵字道父寧國人嘉定七年進士累官江東安撫  
使行宮畱守兼屯田使拜參知政事封金陵侯有  
退菴遺集

登南城

江城一眺思悠悠平楚蒼然野水流衰草寒烟梅丈墓敗垣斜日謝公樓江山有恨英雄老天地無私草木秋萬古興亡俱是夢不知何者為身謀

句

一帶天分南北限兩眉烟鎖古今愁

蛾眉山 以上退菴遺集

吳潛

潛字毅夫寧國人淵弟嘉定十年進士第一淳祐中歷官特進左丞相封許國公以沈炎論劾謫化州團練使循州安置有履齋遺集

睡起行北園

睡起卸冠簪園行獨自吟山昏知雨到樹密覺春深竹外童相報門前客見尋歸來即敗意誰者是知心

即事

春陰漠漠護輕寒春晝無聊午夢閑幽鳥不知人意改銜花飛傍小闌干

以上履齋遺集

聞同官會碧沚

碧沚堂前瞰水官祇應喚作玉壺看頗聞秩秩玳筵展莫遣恩恩銀燭殘酒付別腸寧怕窄詩由廣舌不憂乾老夫孤坐三更月欲往從之道路難

萬頃湖光浩不收花汀竹嶼思悠悠黃公舊隱知何地賀監言歸乞此洲良夜最佳唯午夜今秋偏好是中秋舉杯

酒露月同吸仰面青天可問不

占春亭卽事

桃花幾片隔牆飛獨自危樓徙倚時目送斷鴻雲外沒東風吹淚落天涯

見他門戶插垂楊懊恨江南客子腸春夢誰云無準托連宵合眼是家鄉

題暗香疎影詞後用潘德久贈姜白石韻

人生浮脆若菰蒲四十年前此丈夫擬向西湖酌孤魄想應風月易招呼以上開慶四明續志

和人賦琴魚

仙人藥苗化爲魚身雖纖細味豐腴土人涉溪如採苻以

布爲網猶恐疎不比吳王耽嗜鱸松江千古畱腥滓好似春茶槍與旗俯視銀條不足數人生所樂在家鄉何必定食河之魴琴高仙游不可躡自向崑崙朝玉皇玉皇一笑倚天末乞與五湖任囊括扁舟烟雨歸去來臥聽魚槎聲滅滅

吳禮部詩話宣城涇縣有琴高山有琴高溪俗傳控鯉而升之所每歲三月中有小魚數十萬一日來集亦傳以爲投藥滓所化至今人待此日盡網之曝以爲乾味甚美吳履齋嘗賦詩和人韻云

絕句

編茅爲屋竹爲椽屋上青山屋下泉半掩柴門人不見老牛將犢傍籬眠

句



楊柳年年人老大江山處處客淒涼 以上全芳備祖

汪立中

立中四明人

甲戌廷對後到洞霄丙戌假守新安又得寄徑成詩

紀游

憶昔尋幽興未終重來洞府訪仙翁十年塵土身將隱千  
里華陽路暗通山水祇如前日好松杉似與老人同明朝  
又入黃塵去回首青山一夢中 洞霄詩集

岳岳

岳號煦山丹徒人嘉定十年進士江淮制置使

自淮柵代歸領累偕親友游虎丘偶成影語以紀歲

月淳祐庚戌七月二十五日

一目四蒼莽突然見林丘飛來靈鷲峯幻出蓬萊洲浮圖  
高翠律石徑通深幽生公講經臺曾聞石點頭劔池沓無  
底脩綆汲寒流千古詫異傳此事還是不我來秋向深良  
苗市平疇憂國願年豐一稔銷百憂 虎丘志

陳垣

垣字和仲鄞人嘉定十年進士歷尚書吏部侍郎

國子司業

曰瑄按方氏瀛奎律髓注云陳垣字伯和號習菴其先陽翟人寓居桐廬

分水道中

午困思茶無處煎溪橋側畔認炊烟松窗竹牖人家靜旋  
借沙瓶汲澗泉 前賢小集拾遺

山居次滕元秀韻

解組滄溟畔攜家紫翠閒地臨雙港勝天與兩年閑茅屋  
靜聞雨竹籬疎見山所慚鄰舍老句險不容攀

癡全律隨

釣臺第十九泉

十年不泛釣臺船夢想高風日月邊今日偶來無住著再  
嘗灘下鬻茶泉

嚴州府志

遊虎丘

老龍拖雨過平川曉影初開樹色鮮有片白雲收不盡日  
高猶在講臺邊

碧玉千尋劍影寒夜深光怪逼危闌句吳霸畧成塵土空  
有青山覆石壇

虎丘志

王邁

邁字實之號臞軒居士興化軍仙遊人嘉定十年  
進士調南外睦宗院教授名試學士院改通判漳  
州應詔直言為臺官所劾削二秩淳祐中知邵武  
軍子祠卒贈司農少卿

飛翼樓

舊傳說范蠡故址

亭前一望海東流更有雄樓在上頭燕子飛來春漠漠  
夷仙去水悠悠神交故國三千里目斷中原四百州日暮  
片雲棲古樹昔人畱與後人愁

詩家鼎鑪

除夕

憶昔都門值歲除高樓張燭戲呼盧久依淨社參尊宿難

向新豐認酒徒天子未知工草賦鄰人或倩寫桃符寒宵  
別有窮生活點勘離騷擁地爐

後村千家詩

賀林簿新娶

金華門外厭京塵烏帽山前結幌巾翁壻相看冰映玉庭  
闈一笑頰生春昔言爾爾嫌隨俗今喚卿卿喜有人來歲  
夢蘭嘉兆叶犀錢玉果出娛賓

翰墨大全

句

未知死所先期死自笑狂生老更狂

齊東野語王實之邁有文名落魄不羈爲正字日因輪對及故相擅權理  
宗宣諭日姑置衛王之事邁即抗聲日陛下則日衛王再則日衛王何  
容保之至耶上怒不荅徑轉御屏日此狂生也邁歸鄉里自稱敕賜狂生  
嘗有詩云云

羅必元

必元字亨父號北谷隆興府進賢人嘉定十年進  
士度宗朝累官直寶章閣兼宗學博士

金陵作

本朝遺跡舊山川萬里長江當守邊一念易驕人事廢不  
關飛渡北來船  
凭高懷古思悠悠遙想騎驢白下遊不是龍眠圖畫裏如  
今親到蔣山頭

景定建康志

賈本海新要

今縣恆蘇山題

景安縣志

其高遠古思悠悠滋味白不盡不具請祖圖畫與收

開派與非來

方唯數樹蒼山川萬里灵玉當半數一念長觀人集窺不

金翅非

士與宗博累官直寶章閣兼宗學博士

必示字亭父繼非谷國興與觀人熹宣十

宋詩紀事卷六十二

錢唐 厲 鶚 緝

吳 毛德基 勘定

李元白

元白字希太奉化人嘉定十年進士任永州通判

有四家胡笳詞

曰璐按陳鳴鶴東越文苑有李元白者寧化人工詩嘗集杜句為一編又集大觀昇平詞進之授初

品官一人未知孰是

廢寺

鶚按詩林萬選作李杜

溪沙橫漲水痕平閑扣雲關壁半傾殿上土花人不到斷  
甌支睡岸蟬鳴 後村千家詩

陸德輿

德輿字載之崇德人竣之諸從孫嘉定十年進士  
官至吏部尚書

題資福院平綠軒

帶市人煙遠連村野色幽山從天際出水抱檻前流茅屋  
無端礙松醪有意畱因懷陵谷感無語對沙鷗

至元嘉禾志

鄭清之

清之字德源鄞縣人嘉定十年進士史彌遠薦爲  
魏憲王府教授理宗嗣位以定策功累拜太傅左  
丞相封魏國公致仕卒封魏郡王諡忠定有安晚  
集

癸辛雜識清之淳祐再相政事多出姪孫太原手昏繆貪汗有人作詩譏  
之云先生自號爲安晚晚節何爲不自安

香山貓食粥

梵宮新遣兩狸奴晨粥飢餐食肉如料是伊蒲三昧熟不  
知遶膝訴無魚

詠茄

青紫皮膚類宰官光圓頭腦作僧看如何緇俗偏同嗜入  
口元來總一般

冬瓜

剪剪黃花秋後春霜皮露葉護長身生來籠統君休笑腹  
內能容數百人

以上安晚堂集

淨明院

郊壇齋宮

齋宿虛閑只淨明俗氛暫洗覺身輕半山雲腳炊烟溼一

枕松聲澗水鳴對語老禪真法器譯經新諦出僧繁歸翻  
貝葉蓮花頌猶帶招提月影清

咸淳臨安志

題雪竇妙高峰

陸地芳洲擁翠翹巨靈穿石滾雲濤搏空蒼鳳欲飛舞奔  
海玉龍爭怒號萬象橫陳坤軸富一亭平挹月輪高獨醒  
未覺孤清景笑酌寒泉讀楚騷

延祐四明志

姚鏞

鏞字希聲號雪篷又號敬菴剡人嘉定十年進士  
吉州判官以平寇功擢守贛州貶衡陽有雪篷集

寓雪川

王戴溪頭小隱仙漁翁引上雪溪船幾回倦釣思歸去又

爲蘋花住一年

春夜曲

金魚鎖合蘭釭小酒不支愁睡早梨花欲墮風更寒燕  
子不歸春自老流蘇護帳香雲結三十六簧清吹咽緘書  
欲寄湘水深城烏啼落花西月

桐廬

兩岸山如簇中流鎖翠微風帆逆水上江鶴背人飛野廟  
青桐樹人家白板扉嚴陵臺下過不敢浣塵衣

訪中洲

踏雨來敲竹下門荷香清透紫綃裙相逢未暇論奇字先  
向水邊看白雲

以上雪篷集

題衡岳

萬山環拱祝融尊紫蓋前趨若駿奔火德中天扶日月炎  
方一柱鎮乾坤久無執贄來侯牧空有穹碑立廟門北望  
中原青一髮淒其四岳正塵昏

離衡州

天恩下釋湘纍客心事悠悠月滿船種藥已收思病日著  
書不就負殘年雜花怪石分人去老竹荒亭入畫傳歸夢  
鑑湖三百里白鷗相候亦欣然

法華寺

入門松逕幽樹杪見鐘樓客至犬迎吠香消僧出游水花  
迎晚照風葉引涼秋欲作居山計吾盟在白鷗以上梅磻詩話

秋風

顥氣薄衣襟疎聲集暝林鴈驚烟塞夢鱸入故鄉心靜落  
階前葉清傳月下砧更憐茅屋破愁絕少陵吟後村千家詩

趙東野

東野贛州人

題姚雪篷騎牛像

騎牛無笠又無蓑斷隴橫岡到處過暖日暄風不常有前  
村雨暗卻如何

鶴林玉露姚鏞為吉州判官以平寇論功不數年擢守章貢嘗令畫工肖其像騎牛於湖谷之間索郡人趙東野題云云蓋規切之也居無何忤帥臣以貪劾之貶衡陽人服東野先見

王埜

楚字子文號潛齋金華人嘉定十三年進士理宗  
朝拜端明殿學士簽書樞密院事提舉洞霄宮卒

有文集

劉後村跋潛齋詩本學術隆師友扶忠賢細邪佞愛君如愛親憂民如憂  
已合於詩人之所謂六義者

絕句

雨重垂楊綠未乾一渠流碧弄潺潺  
暝鴉過盡東風惡獨

倚衡門看遠山

全芳備祖

贈凝神菴朱高士

拋卻林泉趣卓菴  
臨近村兩窗吞日月一室養乾坤  
菊露秋籬重松風午枕喧  
蒲團數胎息不肯學傍門

赤松山志

上霄洞

吾聞北山陽巖壑寶相竅何年開鴻濛  
隨地通窅奧朝真高難攀冰壺深莫料  
詭怪者雙龍崖室最蒼峭上霄雖晚  
出煙霞寄孤嶠尋源陟空山訪仙款遺廟  
始探頗褊窄稍入亦窈窕上穴由梯升  
傍穿須火照青厂既鬱鬱白乳仍  
矚矚旁通多曲折幽眇轉奇妙窮探豈不欲  
所畏自微燭昏昏蝙蝠飛悄悄颼颼叫  
或疑洞靈出或恐山鬼嘯又聞村中氓  
鑿石供灰燒俄然得深竇傾城盡登眺  
何人不好事室塞迷其要此雖幸獨存荒  
僻委蓬藿儻移傍京邑車馬日號召了知  
神仙事茫昧不堪弔豈無隱淪士巖築像  
唯肖畬田沃可耕澗水清可釣平生愛泉石  
自謂飢可療喜茲近吾隱來往足談笑此意復  
誰論行行逢荷蓀

金華府志



清明日游鶴林寺

蒿目黃塵擾擾閒出門偶到鶴林山  
仙花僧竹俱陳迹白日青天祇自閒

竹院閑來春正遲籜龍猶自有孫枝  
野夫豈識尋芳意爲愛光風面面吹

鶴林寺志

李伸之

伸之官統制爲金人所獲不屈死

獻帥府經歷

一飯感恩無地報此心許國已天知  
曾中千古蟠鍾阜一死鴻毛斷不移

劉祁歸潛志貞祐南征獲一統制官李伸之者帥府經歷官劉達卿召而飲之且誘以降將宥焉伸之獻詩云云竟就死

蔣重珍

重珍字良貴無錫人嘉定十六年進士第一  
理宗

朝歷官集英殿修撰刑部侍郎致仕卒諡忠文

題蕭岳英常州朱氏畫草蟲卷

常州草蟲天下奇女郎新樣不緣師未應好手傳  
輪扁便恐前身是郭熙

筆端生意已如生點綴沙蟲機不停淺著鵝黃作胡蝶深

將猩血染蜻蜓

咸淳毘陵志

自題雲龍小隱

龍山錫山兩山雲出能爲雨入氤氳雲山之氣有斂散斂  
散之理斯爲神我廬山下有小隱雲爲動兮山爲靜悠然

而出物之澤屹然而峙地之鎮我見雲山喜與俱雲山無情不見余我比雲山多此見日月相看兩不厭

常州府志

徐鹿卿

鹿卿字德夫隆興豐城人嘉定十六年進士理宗朝累遷太府少卿兼右司權給事中歷禮部侍郎提舉鴻禧觀致仕卒諡清正有泉谷存稿

湛泉酌餞黎丈有詩壁閒遂次其韻

幾人林下賦歸休公獨翩然汗漫遊味道不妨寒似水入時須用曲如鉤從來鄰父邀皆去底事官曹挽不畱後夜相從邨復得月明千里故山秋

鬱孤洞天

夢跨長虹海上遊寒生肌骨一壺秋好風吹得詩魂醒自寄人閒羣玉樓

以上泉谷存稿

章鑑

鑑字君玉號藝齋昌化人嘉定十六年進士官至華文閣待制

林洪山家清供云章藝齋字德清時雖槐古馬高尤喜延客然飲食多不取諸市恐旁緣以擾人

金錢花

巧冶都由造化爐風磨雨洗好形模花神果有神通力買斷春光用得無

合璧事類別集

牟子才

子才字存叟其先井研人家湖州嘉定十六年進

士理宗朝歷官權禮部尚書兼直學士院國史實錄院修撰以資政殿學士致仕卒諡清忠有存齋集

南園

買家喜傍水精宮正是南園故址中我欲築堂名六老追還慶歷太平風

齊東野語慶歷六年吳興太守馬大卿會六老於南園酒酣賦詩教授湖學安定胡先生為序其事六人者工部侍郎簡年七十九司封員外郎范說年八十六衛尉寺丞張維年九十一俱致仕劉維慶年九十二周守中年九十五吳琰年七十二皆有子弟列爵于朝詩及序刻石園中後園廢為牟氏之居存齋詩云云

趙以夫

以夫字用甫號虛齋長樂人嘉定進士知漳州理

宗朝歷資政殿學士吏部尚書同修國史

詠蘭

一朵俄生几案光尚如逸士氣昂藏秋風試與平章看何似當時林下香 全芳備祖

戴栩

栩字文子永嘉人嘉定中進士湖南安撫司參議

松臺王綽云永嘉之作唐詩者首四靈繼四靈之後則有劉詠道戴文子張直翁潘幼明趙幾道劉成道盧次夔趙叔魯趙端行陳叔方者作而鼓舞倡率從容指論則又有瓜廬隱君薛師石焉

白鶴寺

子晉昔游處平臺片石成寺名猶記鶴松響卻疑笙巖壁飛雙瀑金沙照一泓野人豈仙伴隨鹿過溪行 前賢小集拾遺

送廬陵胡季昭夢昱以上濟邸封事貶象州

古郡荒涼象跡新君行況是去裝貧此愁欲別柳邊雨  
日初程桂外人從古不多如意事加滄宜惜未歸身春風  
未必天涯盡木斛花開瘴水深

象臺首末

李義山

義山號後林嘉魚人嘉定中進士樞密院編修

題梅壇毛慶甫雲悅樓

雲本無心悅者誰華陽去後少人知欲分半席無因到一  
片飛來是覓詩

梅仙事實

幸元龍

元龍字震父高安人舉進士理宗朝任朝奉郎郢

州通判有松垣集

遊越山

上得越山半方壺紫翠環山幽春溜響花落午陰閑梵刹  
依松外仙家在竹閒小窗借高枕風定鳥綿蠻

松垣集

陸 屋

屋號盤隱官府判嘉定中與僧居簡倡和

冷泉亭放闌水

泉聲飛出闌委折綠陰閒此地原無暑多時不入山草敲  
疑石墜水定見魚還難得同猿鶴游吟半日閑

咸淳臨安志

畱 碩

碩字仲志魏公正之子嘉定閒守南恩州

陽江勸農

春風句引出郊行小隊迢迢草路平自笑田蕪不歸去三  
千里外勸人耕

肇慶府志

錢厚

厚字惠載嘉定中常熟令號竹巖嬾翁有竹巖拾

棗

漱石軒

危石參差上霄漢中涵萬壑冰玉清與誰流出洗塵滓遺

我一林風雨聲

洞霄詩集

崔起之

起之嘉定中爲宣城尉

題萬翠亭

亭在旌德姚司戶建

名山繞旌川未易千百計樓真聳其西二幕青扞蔽柳山  
與龍山連亘殆無際大鼇從東出石鼓相軒輕華容接鶴  
形蔓衍若難制擁南有梓山盤屹萬里勢有殿曰甘露岡  
翠插天地玉壺枕其北鳧山復相比礮嶺介鳳凰大洞闌  
天祕姚君天韻奇氣槩高一世胸中飽正壑作亭非壯麗  
獨能極遐觀領畧萬山翠蒼玉無遁形秀色歸一視卻笑  
昔人非所見殊無異東亭亂清暉僅得翠微意東山羅紅  
帚未免聲色累唯君別幽趣徜徉樂清致青山不改舊領  
客時一醉

寧國府志

史彌寧

彌寧字安卿鄞人浩之姪嘉定中以國子舍生蒞春坊事帶閣門宣贊舍人知邵陽有友林乙橐

寄雲夫

黔國相逢地蒼燈共夜篝雲龍念東野栢馬歎之采郵傳  
一分手河山再見秋交情如繾綣不在寄書稠

鄭中卿惠蝓蚌

客窗不作侯鯖夢隨分魚鰕薦一杯食指怪生連夜動敲  
門郭索送詩來

寄慥齋弟

鷗鷺逢人問歸信三年作客負滄洲詩袍醉帽黃埃底羞  
見扶風馬少游

春暮同社會飲張園小樓得飛字

殘紅委地水平池楊柳陰陰鶯亂飛山色滿樓新雨後一  
簾風絮卷春歸

以上友林乙橐

史彌鞏

彌鞏字南叔浩從姪嘉定中進士江東提刑

題羊左墓

餘耳當年刎頸交所爭利害僅豪毛一朝泚水相屠戮豈  
識羊哀左伯桃

景定建康志

史安之

安之字子田浩之孫嘉定初知噸縣求高似孫作  
剡錄邑之文獻藉以不墜

高山堂和節度梁公韻

在寶積寺後僧擇璘建

閣憑鬼構敞軒局一望塵凡日暫醒巖嶂遠供千疊翠松  
篁還聳四時青登臨雅愛恣吟筆圖畫尤宜作座屏我欲  
從君遊未得壯心方欲翥南溟

嶧縣志

李 訖

訖字誠之號耀菴晉江人雲龕居士邴之孫嘉定

中以朝議大夫敷文閣待制守建州後為戶部侍

郎

謁丞相祠觀八陣圖

人言忠孝不磨滅神物護持存水滸千家陵谷幾變遷此  
石不移自章武本由黃帝古兵法六十四以八為伍髯孫

且懼仲達走賊操遊魂何敢拒刻銘沙沒水底碑教戰石  
存山下鼓一片丹心天地閒萬世聞風猶禦侮我來起敬  
凜如生再拜一言公必取瀼流東截陣圖前寢隳城壁頽  
民宇能安拳石止波流願回瀼患思民撫常使夔人知感  
公踏磧年年弔千古

控巴臺次韻

誰道地拘偪仄須知天闊幽妍一段丹青臺閣何人淡掃  
松煙

以上四川總志

楊長孺

長孺字伯子號東山萬里子嘉定閒守湖州後為  
番禺帥端平初累辭召命以集英殿修撰致仕家

居卒

跋大人論配享書橐

覆羹真得阜囊書錦水元來勝石渠但寶銀鉤并鐵畫何須玉帶與金魚

鶴林玉露高廟配享洪容齋在翰苑以呂頤浩趙鼎韓世忠張俊四人為請蓋文武各用兩人出孝宗意也遂令侍從議識者多謂呂元直不厭人望張魏公不應獨遺楊誠齋時為秘書少監以書爭之以專欺私三罪斥容齋且言魏公有社稷大功五建復辟之勳發儲嗣之議誅范瓊以正朝綱用吳玠以保全蜀卻劉麟以定江左於是再令詳議越數日上忽論大臣曰呂頤浩等正合公論更不須議洪邁固是輕率楊萬里亦未免浮薄于是二人皆求去容齋守南徐誠齋守高安當苗劉作亂時矯隆祐詔貶竄魏公高宗在昇陽官方歿羹左右來告驚懼羹覆于手手為之傷暨復辟見魏公泣數行下舉手示公痕跡猶在

題湖州畫像

面有憂民色天知報國心三年風月少兩鬢雪霜深更莫

畱形跡何曾廢古今不如隨我去相伴老山林

鶴林玉露嘉定閒楊伯子為湖州守治聲為三輔冠郡士相與肖像祠于學宮與工部尚書戴少望並祠伯子意不悅會持浙東庾節將行辭先聖先師禮畢與校官諸生坐講堂命取畫像題詩其上遂卷藏而行當時士子有戲和其詩者末句云可憐戴工部獨樹不成林

茨菰花

折來趁得未晨光清露晞風帶月涼長葉剪刀廉不割小花茉莉淡無香稀疎略糝瑤臺雪升降常涵翠管漿恰恨山中窮到骨茨菰也遣入詩囊

句

三閒破屋一牀書錦心繡口冰肌膚自初枯葉作袴襦此君便是長鬚奴

題貧樂圖和徐思叔韻 鶴林玉露

吳晦之



晦之寧國人

寧國府志嘉定中與韓沈仲和石巖魯瞻相友善沈善書嘗手書晦之十絕句自為跋世稱吳詩韓字可謂並美

寄石魯瞻

憶昔從遊杖履中有山亭上醉春風主人已作騎鯨客注自

時仲和已歿誰識當年兩病翁寧國府志

彭仲衡

仲衡清江人

丫頭巖

前峰號龜今是龜近巖謂月亦匪月世間景幻語未真說  
著了頭便癡絕蒼然頑石由天成道旁過者皆含情我來  
於此發浩歎乃知有色能傾城蘆浦筆記

胡偉

偉字元邁嘉定閒新安布衣寓吳中有宮詞集句

鶚按玉照新志云胡偉元邁新安人父舜申作乙巳泗州錄已西避亂錄  
据此當是胡仔元任之從兄弟也

宮詞集句

雞人唱曉五門開宮女更番上直來御仗催班元會集遙

聞索扇一時回羅鄴 花葉夫人 王禹玉 王建

披香仙殿試春衣等候官家未出時整了翠鬟勻了面大

家裝著鬪時宜晏同叔 花葉夫人 宋子京 王禹玉

殿前香騎逐飛球一樣真珠絡轡頭誇道自家能走馬掉

鞭橫過小紅樓張籍 王禹玉 王建 花葉夫人

映林先發幾枝梅準擬君王便看來競走巾車迎鳳輦殿

前排宴賞花開

元微之

王建

吳可

花藥夫人

美人弄鏡插梅花抹月批雲自一家三十六宮春信早不  
應青女妒容華

鄭毅夫

饒節

蔡文饒

洪玉父

新生帝子浴漪瀾頻奏仙韶喜誕筵願上玉宸千萬歲大  
家恩賜洗兒錢

宋白

吳可

王禹玉

吳曠

十家宮詞

汪莘

莘字叔耕休寧人嘉定中以布衣應詔上封事不  
果用有方壺存稿

秋日飲錢塘門外雙清樓

西湖日日可尋芳樓上憑闌意未忘斫取荷花三萬朵作  
他貧女嫁衣裳

次潘別駕韻

野店溪橋柳色新千愁萬恨爲何人殷勤織就黃金縷帶  
雨籠煙過一春

夏日西湖閑居

十里湖山苦見招柳隄荷蕩赤闌橋待他朝市人歸後獨  
泛扁舟吹玉簫

露冷風清斗柄遷芙蓉零落謝家船都人正作黃粱夢獨  
占西湖明月天

以上方壺方彙

詹初

初字子元休寧人以薦入太學爲學錄與汪莘善  
有流塘集

出心原

心原在流塘南

行行陟南原遙望北山岑上有千尺崖下有高樹林高林  
轉幽奧戛然啼雙禽流水自迅逝白雲澹無心策杖者誰  
子閒來坐春陰相逢籜林下攜手溪水濱對之兩無言悠  
然鳴素琴素琴清且越暢以披沖襟沖襟良自爾那知春  
已深

流塘集

雷元剛

元剛字茂潛永春人嘉定閒直學士院有雲麓集

武夷九曲棹歌

存一首

七曲催船快上灘好山畱與漫郎看經行雪瀑仙屏下恍  
記齋堂夜帳寒

九曲遙岑更鬱然板橋漁市引長川喚回白馬賓雲夢來  
看桑麻萬里天

鐵網珊瑚

王益祥

益祥長樂人寧宗朝官監察御史

題資福院平綠軒

丈室無餘地生涯小有天推窗成曠闊俯檻遶清漣載酒  
日邊客聞歌柳外船隔牆人易與賸著買山錢

至元嘉禾志

陳宓

宓字師復丞相俊卿子以父任入官寧宗朝歷軍  
器監簿出知南康軍改南劔州寶慶初致仕

城山

穀城巖穴似飛來十里湖光鏡面開夜雨松窗僧榻靜秋  
風柳岸釣船回尋幽便叩生雲洞乘興還登呼月臺每到  
西湖吟咏處令人偏憶故山梅

興化府志

張潞

潞字東之吉之永新人牧昭州詩師誠齋石湖有  
張昭州集

句

策勲蓑笠上自是一雲臺巖瀨憂兒行不得勸客不如歸二答

禽獨木乘危涉勞薪帶溼炊秋雨紫垂戶外瞻天近綠墜樓

前到地香紫牡丹 後村詩話

陳堦

堦俊卿之後知南安縣

謝趙憲副使惠建茶

貢餘自合到侯王誰遣甘芳入菟腸野客驚看龍鳳鈔家  
人學試蟹魚湯題來諫議三封印分到尚書八餅網盡灑  
從前腥腐氣時時澆取簡編香

莆陽文獻

曾槃

槃字樂道幾之孫左司逢之子宫工部

句

還持病眼將昏力來看仙山未了青

題武夷 合璧事類續集

吳機

機字子發天台人嘉定中知真州

題烟雨奇觀樓

在真州吳機建取葉石林半空烟雨之句

此景儀真亦有年何人管領向樓前江淮自昔雖南北烟  
雨從來有變遷萬里孤帆遺恨在半空佳句至今傳諸公  
欲會當時意且對滄波汎酒船

儀真縣志

宋詩紀事卷六十二

宋詩紀事卷六十三

錢唐 厲 鶚 緝

錢唐 許承模 勘定

黃 榦

榦字直卿號勉齋閩縣人受業朱子之門以子妻  
之寧宗朝補將仕郎歷知漢陽軍主管武夷冲祐  
觀復知安慶府主管亳州明道宮致仕卒諡文肅  
有集

答曾伯玉借長編

白露下百草迅商薄秋林幽人起長歎感此節物深攬衣  
自徘徊撫劒還悲吟丈夫各有志莫作兒女心涉遠當疾

趨畏影須就陰願言理輕車去上南山岑

訪高簽判故居

遠樹分高下平洲接有無短亭低密竹小艇隱寒蘆轉浪  
魚深八斜陽鷗亂呼自慚貴公子未老賦歸歟

侍文公飲浮翠亭用劉叔通韻

涼風振幽壑陰雲翳前山高情厲清秋適意林莽閒煙橫  
萬家井水淨雙溪灣徙倚暮忘歸人境相與閑遊子獨何  
爲千里方言還陪此杖屨遊忘彼道路艱心期更他日依  
巖結柴關

過翠微

古寺殘僧少孤村碧樹圍明朝山下路愁絕望煙歸以上勉齋集

陳淳

淳字安卿龍溪人受業朱子之門嘉定中以特奏  
恩授安溪簿有北溪字義

題江郎廟

三石參天作柱擎自從開闢便崢嶸何爲末俗好奇怪盡  
道江郎魄化成四朝詩

輔廣

廣字漢卿號潛齋父達本河朔人南渡居秀州之  
崇德縣從呂成公游後登朱子之門自祠官歸隱  
以著書爲已任有六經注釋四書問答等藏于家  
題資福院平綠軒

名區與利壠羊腸盡攀躋誰能爲芳草四曠成幽棲春風  
一憑闌秀色無高低山遙不作障水近何妨堤只恐金氣  
寒黃枯變碧萋坐令羣目驚有似七聖迷人心無天游六  
鑿相攘擠但于平處觀衆有何端倪日月互賓送景物隨  
乖睽彼昏如執著惟君試金篋至元嘉禾志

蔡元定

元定字季通建陽人從朱子游尤表揚萬里薦于  
朝以疾辭韓侂胄設僞學之禁爲言者所詆謫道  
州卒後贈迪功郎賜諡文節學者尊之曰西山先  
生

自勵詩

數閒茅屋環流水布被藜羹飽暖餘不在利中生計較肯  
于名上著功夫窗前野馬閑來往天際浮雲自卷舒窮達  
始知皆有命不妨隨分老樵漁武夷山志

蔡淵

淵字伯靜號節齋元定長子

仲弟未歸歲晚有懷

明月照席寒生我愁百端冉冉歲云徂游人不顧還相送  
荷花碧相望楓葉丹高樓日千回散步東林隈攀條復攬  
秀日暮空徘徊金杯白玉臺猶能對寒梅寄書豈不早三  
月千里道敢怨歸軒遲但念堂中老春風萱草生更樹堂

前庭

詩家鼎鑪

蔡沈

沈字仲默元定子少游朱子之門從父謫道州護  
喪還隱居九峰卒諡文正

遊西山

柴荆相依倚綠篠自蒙密秋蘭湖中花山果路邊實沿岡  
引霜藤臨流坐寒石日暮陰崖開雲收遠山出踈籬尚存  
菊荒庭舊垂橘絲桐想虛堂簡策見靜室俯仰今幾時漫  
然已陳迹摩挲蒼苔痕屐齒不可識

建寧府志

贈琴士翁明遠

膠漆本無意絲桐非有情因緣醉翁指發此無窮聲蕭蕭  
秋風引葉落渭水濱喧喧陽春歌花明錦江城離鸞月徊

徊別鶴雲冥冥清冷灑毛髮震蕩驚雷霆曲度神莫測調  
高妙難名時方多艱虞掩耳誰爲聽無爲恩怨兒女語敵  
場勇士軒昂行

詩家鼎鑪

武夷山天柱峰

才旣非時用性本愛岑寂決策名山游幽隱遂成癖春風  
百花紅秋月千嶂碧煙霞結綢繆猿鳥自疇昔乘閒撫深  
曠噴薄鳴鐵笛笑挹天柱峰高寒幾千尺

大隱屏

昔余隱屏東扁舟夾雙龍浩歌碧雲裏萬壑生清風羣仙  
幔亭宴玉女雙鬢蓬夕景落寒巖照耀金芙蓉  
昔余隱屏北飄然度巖側誰知神仙居自與塵世隔瑤草



冬更青琪花雪爭白橫玉吹寒空萬里天一色

以上武夷山志

章才邵

才邵字希古崇安人以父蔭補官嘗守臨賀辰陽  
晚歲與朱子游世稱為篤實君子

過清遠峽

崑頭風急樹敲斜溪畔漁樵十數家老盡往來名利客年  
年秋水映蘆花

錦繡萬花谷

釣臺

短櫂夷猶七里灘人亡依舊水光寒漢家名節君知否盡  
在君家一釣竿

釣臺集

劉子寰

子寰字圻父號篁嶧建陽人居麻沙早登朱文公  
之門有篁嶧集

杜若

欽州五月土如炊滿山杜若芳菲菲素英綠葉紛可喜勁  
烈不避炎歊威採之盈掬薦蔬食臧獲失笑庖人譏君不  
見屈平夕餐賦秋菊魂兮無南盍來歸又不見坡公服食  
得臬耳扣角自嘆從前非伊予假祿二千石窮比二子猶  
庶幾滄花嚼蘂有真樂一飽何必謀甘肥尚餘升合漬生  
蜜從他薏苡生珠璣

全芳備祖

金鳳花

天霜凋九陵梧桐日枯槁鳳德何其衰驚飛下幽草九苞

空髣髴衆彩各自好黃中獨含章見晚更傾倒託根幔亭  
峰弱質深自保便翮金翅短淡泊乃幾道俗眼迷是非人  
間跡如掃

合璧事類別集

劉炎

炎字潛夫號撝堂學於朱子

王剛仲惠詩醉筆聊和

君不見山澤之癯蒙野服如彼隰桑還自沃又不見侯門  
公子貴且驕飽豢膏粱猶未足人生貴賤不難分唯有聖  
賢無等倫朝爲塗人暮爲禹窮崖斷壑看回春君方妙齡  
截不住萬里飛黃又騰去王良造父不得施耳側風聲未  
爲遽我思古人愛其宇青蘋堂兮杜若蕪芰荷可裳菊可

餐肯介纖埃與塵土是中非聲亦非色安得與君一憑軾  
鷗鵬變化不可量要指天地爲一息悠悠此道誰能將從  
知可玩不可望慎勿隨風學飄絮春光駘蕩成飛揚

濂洛風雅

楊與立

與立字子權浦城人受業朱子之門嘗知遂昌縣  
因家蘭谿學者稱船山先生

幽居

柴門閒寂少人過盡日觀書口自哦餘地不妨栽竹木放  
教啼鳥往來多

濂洛風雅

林用中

用中字擇之號東屏古田人從遊朱晦庵之門偶

借晦翁走潭州訪守張敬夫因有南嶽之游著倡  
酬詩百四十餘首

敬夫用晦翁定王臺韻賦詩同次韻

寂寞番君後光華帝子來千年餘故國萬事只空臺日月  
東西見湖山表裏開從知爽鳩樂莫作雍門哀

後洞山口晚賦

西嶺更西路雲嵐最窳深水流千澗底樹合四時陰幽絕  
無僧住閑來有客吟山行三十里鐘磬忽傳心

贈上封諸老

上封臺觀靜夕霽景偏清月下聞禪語風中有磬聲龍池  
畱古跡鴈塔寄餘情借問房前樹東窗忽偃生以上南嶽倡酬集

方士繇

士繇字伯謨號遠菴莆田人豐之之子從朱子游  
稱高弟有集

昇山卽事

一徑西風裏閑房客未歸砌苔侵野屐林葉上秋衣黃卷  
經心嬾青綸入夢稀還書報妻子莫厭故山薇詩林萬選

崇安分水道中

溪流清淺路橫斜日暮牛羊自識家梅葉陰陰桃李盡春  
光已到白桐花詩家鼎鑪

武夷山

丹厓石氣凝高秋碧溪上引天河流金堂石室不可到玉

棺莓苔生古愁仙人昔乘紫雲去白馬搖鞭在何處茫茫  
塵世那得知幔亭空記當年事君不見茂陵松栢已蕭疎  
乾魚猶祭同亭祠

莆陽文獻

章康

康字季思浦城人居吳隱居不仕人稱曰聘君從  
學於朱晦菴淳祐中卒有集

破山寺

名山久相望今日爲著屐到寺第一義古松足蟠屈一一  
龍蛇形風雷氣蕭瑟瓔珞檜兩株皆數百年物佛燈耿青  
熒像設暗金碧雲廊極徘徊老屋共啐兀僧房小盤薄西  
原訪泉石于其最幽絕似可便築室因而思古人多有愛

山癖要之亦何爲一賞事已畢上方不及登尚或俟他日  
無非會心處妙同箭鋒直山靈謂何如移文茲不必作詩  
畱山中併可告來轍

破山寺志

程先

先字傳之休寧人與子永奇俱從朱子學有東隱

集

和人感秋韻

疾風拔枯楠天作破瓦色古殿無飛塵過者見瑟瑟  
憶昔遊吳甸新知結項容松江楓落後貌得洞庭峰

秋風

秋山新安文

獻志

程永奇

永奇字次卿新安人嘗登朱子之門有格齋集

題耕隱卷

山下巢雲夢亦清隴頭耕雨綠蓑輕時人共指龐居士為  
借農書一到城 新安文獻志

劉淮

淮字叔通號溪翁建陽人朱文公之高弟

朱子跋云叔通之詩不為雕刻纂組之工而易從容不費力處乃有餘味

韓家府 嘉定初作

寶蓮山下韓家府鬱鬱沈沈深幾許主人飛頭去和虜綠  
戶雕牆鎖風雨九世卿家一朝覆太師之誅魏公辱後車  
不信有前車突兀眼前有此屋

四朝聞見錄韓侂胄居太廟三茅之旁後山為閣古堂為閣古泉舊名青衣有青衣童見泉上故名為流觴曲水泉自青衣下注于池凡有十二折旁砌以瑪瑙泉流而下瀦于閣古堂渾涵數畝有桃坡十有二級夜宴則殿巖用紅燈數百出于桃坡之後以燭之其雲巖之最奇者曰雲岫侂胄居之既久歲累月積剔奇抉勝窈窕深疑為洞天福地之居不類其為在天衢咫尺舊皆寧壽觀中也韓敗有旨盡給還寧壽復為禁地建陽劉淮賦詩云云

平遠臺

海天漠漠水雲寬開到梨花正自寒卻擁重裘上平遠愁  
心千疊倚闌干 詩家鼎鑪

劉仙倫

仙倫一名儼字叔儼廬陵人有招山小集

得蟹無酒

水鄉秋晚得白蟹望斷碧雲無酒家此意淒涼何所似淵

明醒眼對黃花

西林

路入廬陵西復西  
翠煙深處著招提  
山僧幾輩雪垂領  
水鳥數聲雲滿溪  
莫對青山談世事  
且循粉壁看留題  
禪房夜臥衣裳冷  
夢破鐘聲落月低

盱江驛舍中有婦人書一憶字筆勢頗姿媚游子明  
王相之皆題詩其後率予同賦

陽臺雨歇行雲杳  
天闊鴻稀春悄悄  
鷓鴣孤眠怨芳草  
夜夜相思何日了  
妾非無聲不敢啼  
妾非無淚不敢垂  
柔情欺損青黛眉  
夢魂暗逐胡蝶飛  
春風著人鎖窗綠  
絲窗書字寄心曲  
細看香翰婉且柔  
中有閑愁三萬斛  
向隅棄筆

惆悵時此情默默誰得知  
無緣相見空相憶  
不如當日休相識

以騎驢鍾馗送秦先之

髯翁鬢鑠老據鞍  
曾入大內見阿瞞  
幞頭垂腳藍綬敝  
不知班簿爲何官  
天寒歲晚日云暮  
霜風吹驢耳卓豎  
老臧負笠衣裳單  
反袂掩目趾穿屨  
華門我恐難畱君  
收卷送似秦將軍  
將軍文事有武備  
眉骨自是凌烟人  
汝當訶護謹厥職  
勿但縮頭徒挂壁  
將軍來歲在殿巖  
豐汝牲醪作除夕

贈岳周伯

昔年搥鼓事邊庭  
公相身爲國重輕  
四海幾人思武穆  
百

年今日見儀刑筆頭風月三千字齒頰冰霜十萬兵天亦  
知人有遺恨定應分付與中興

題岳陽樓

八月書空鴈字聯岳陽樓上俯晴川水聲軒帝鈞天樂山  
色玉皇香案煙大舶駕風來島外孤雲銜日落吟邊東南  
無此登臨地遣我飄飄意欲仙

以上招山小集

岳珂程史云余兄周伯喜誦之

劉 植

植字成道永嘉人號漁屋安上曾孫

過彭澤

井邑已非舊柴桑里尚存春風三畝宅落日數家村隔樹

聞鷄犬編民半子孫頽然孤隴上寒菊遶松根

東甌詩集

劉 翰

翰字武子長沙人吳雲壑居父之客有小山集

翠屏曲

小亭簾幕垂陰陰梅香入枕春生屏西窗月落翠被冷鳥  
聲殘夢東風醒三年不喚清溪渡夢裏灑西春水路江頭  
女兒雙翠眉能唱劉郎芳草句

種梅

淒涼池館欲棲鴉彩筆無心賦落霞惆悵後庭風味薄自  
鉏明月種梅花

石頭城

離離芳草滿吳宮  
綠到臺城舊苑東  
一夜空江煙水冷  
石頭明月鴈聲中

鴻門宴

江東遙遙八千騎  
大戰小戰七十二  
劉郎曉鞭天馬來  
蹴踏長安開帝里  
子嬰已降隆準公  
君王置酒鴻門東  
張良已去玉斗碎  
三月火照咸陽紅  
繡衣歸來日將夜  
可惜雄心天不借  
當時已失范增謀  
尚引長戈到垓下  
刁斗乍急營壘驚  
夜深旗尾秋風橫  
玉帳佳人不成夢  
月明四面聞歌聲  
拔劍相看淚如雨  
我作楚歌君楚舞  
明朝寶馬一聲嘶  
江北江東皆漢土

吳門行

吳歌婉婉清如水  
西風曉自閶門起  
雙橈艇子采菱來  
翠苕綠蘋香十里  
芙蓉影落已知秋  
濺溼羅衣眉黛愁  
回身蕩槳入門去  
明月家家秋水流

立秋日

乳鴉啼散玉屏空  
一枕新涼一扇風  
睡起秋風無覓處  
滿街梧葉月明中

客去

送客歸來月滿簷  
梅花微笑隔疎簾  
酒醒今夜銀屏冷  
沈水熏爐旋旋添

以上小山集

劉應時

應時字良佐慈溪人有頤菴集



旅舍

草市欲黃昏吾行恰到門僕夫思憩息燈火喜溫存一夜  
催花雨數家臨水村征途雖得句默坐與誰論

早行

登輿睡思尚昏昏斗柄銜山月在門鷄犬未鳴潮半落草  
蟲聲在豆花村

曹直夫水石短軸

奔流出峽響如雷筆力浮天亦壯哉吳蜀興亡千古恨白  
鷗時逐浪花來

雪夜

迎春寒色愈嚴凝小閣爐殘冷欲冰寂寞黃昏愁弔影雪

窗怕上短檠燈以上頤菴集

李翔高

翔高號羽軒

句

春愁自是無重數又被東風揭繡簾

貴耳集李羽軒善為絕句盧蒲江甚愛之有句云云老子興不淺也

劉學箕

學箕字習之屏山先生子輩之孫七者翁珩之子  
有方是閑居士小稿

劉叔通云居士詩摩香山之壘詞拍稼軒之肩

不如歸去禽言

不如歸去愁絲怨紅春欲暮汝勸行人歸行人勸汝住鳴  
聲不住良苦辛啼得血流無用處不如歸去吾今歸千聲  
萬聲爾何爲

環洲江氏園

欲覽環洲勝維舟步石磯踏青隨野色穿翠任春霏地迴  
知山遠村灣覺水圍東風輕薄甚桃李亂荆扉以上方是閑居  
士小稿

武衍

衍字朝宗汴人有適安藏拙餘橐

方蕙岳跋云東坡見齊安朱廣文小詩云官閑廳事冷胡蝶上堦飛謂其  
可入畫圖適安此卷絕句摹寫景物吟詠情致多有可筆於丹青者惜不  
遇坡之品題

宮詞補遺

牡丹春籞正穠華有旨今年不賞花翦落金槃三百朶內  
批分賜近臣家

開元廣寒詞

桂華珠殿水精樓柘袖籠香乙夜遊飛下銀橋人不覺月  
明三十六宮秋

聞角呈宗諭方蕙巖

曉角吹愁客夢寒一聲聲落畫屏閒吳兒可殺無風味老  
卻梅花只當閑

柳枝詞

靈和殿裏最風流三月飛花滿御樓換得玉人眉樣巧一  
春渾不下簾鉤

秋夕清汎

弄月吹簫過石湖冷香搖蕩碧芙蓉  
貪尋舊日鷗邊宿露溼船頭數軸書

春日湖上

飛鷁鳴鑼鼓吹喧繁華應勝渡江前  
吟梅處士今還在肯住孤山爾許年

長橋月夕

捲來滄海黃銀浪飛出層雲白玉團  
千古垂虹奇絕處獨憑三百赤闌干

老宮人

侍輦看花上苑春太皇宣索鳳笙頻  
如今猶記當時曲對

譜閑教小內人

寶髻無光玉貌昏銜悲空感舊承恩  
君王愛問先朝事時許車兒到殿門

湖亭席上贈商素

一曲春風已擅場淺顰低嘯更傳觴  
令人憶殺香山老舊日玲瓏也姓商

貴游

鈿車輾轆碾芳塵步障香移一片春  
花下玉盤行禁巒御前宣勸到湖濱

清明湖上

榆火初傳禁漏殘滿城和氣在湖山  
接天楊柳風煙裏照

宋詩紀事卷六十三  
水桃花圖畫閒舊路人穿新路去長橋船出斷橋還吾皇  
應喜民胥樂歲許西門入夜關

飲湖亭

寒食梨花月新晴楊柳風愁消山色裏興極酒杯中綠髮  
日夜變青春今古同忍教行樂地容易夕陽紅

以上適安藏拙  
餘彙

戴敏

敏字敏才號東臯子台州黃巖人石屏之父有東  
臯集

小園

小園無事日徘徊頻報家僮送酒來惜樹不磨修月斧愛  
花須築避風臺引些渠水添池滿移箇柴門傍竹開多謝  
有情雙白鷺暫時飛去又飛回

初夏遊張園

乳鴨池塘水淺深熟梅天氣半晴陰東園載酒西園醉摘  
盡枇杷一樹金

以上東臯集

句

人行躑躅紅邊路日落秭規啼處山

劉後村詩話

桑世昌

世昌字澤卿淮海人居天台陸放翁諸甥著蘭亭  
博議回文類集莫菴詩集

句

翠添鄰塹竹紅照屋山花

葉水心題跋君詩尤工其即事句蓋著色畫也

### 王大受

#### 大受字仲可鄱陽人有拙齋詩集

四朝聞見錄水心先生葉適題王大受拙齋詩藁云紹熙四年光宗疾不能朝重華諫者傾朝謗者盈市憲聖后兄子琚最賢大受因琚奏孝宗陛下惟一子不審處利害恣國人騰口取名於家計大不便且羣臣以父子禮故諍不敢止陛下何不出手詔云皇帝體不安朕所深知卿且勿言須秋涼朕自擇日與皇帝相見也孝宗喜其策會晏駕不果用攻媿樓公憤其前與族兄鏞有閒且毀其父力言之于史相期以必竄大受史遂命去大受袍笏編置邵武琚之子綱以藁上于朝而削大受姓名

### 遊鹿苑寺

鷲峰遊屐少我獨住多時僧護翻經石  
猿攀礙月枝地寒春到晚山遠夢歸遲  
尚被浮名誤吾心信自癡

詩林萬選

### 水樂洞

歷騁寒空六六天更來洗耳聽春泉  
迅湍激石浮清磬樹溜行沙寫素弦  
路口林亭三四面洞中日月幾千年  
何人獨得開收律譜入宮商與世傳

咸淳臨安志

### 句

君不見牛奇章與李衛公二人平生不相容  
門前冠蓋互咿軋惟有愛石心則同

題李季章石林 四朝聞見錄

### 徐照

照字道暉一字靈暉號山民永嘉人有芳蘭軒集

### 四靈之一

葉水心誌徐山民墓云山民有詩數百琢思尤奇皆橫絕欸起冰懸雪跨使讀者變蹕慄慄肯首吟歎不能自己然無異語皆人所知也人不能道

爾 獻通考陳氏云徐照徐璣翁卷趙師秀四人號永嘉四靈皆晚唐體也

宋詩紀事卷六十三  
惟師秀嘗登科改官亦不顯  
趙東閣汝回云唐風不競派沿江西永嘉四靈乃始以開元元和作者自  
期治擇淬鍊字字玉響雜之姚賈中人不能辨也  
梅圃詩話永嘉徐照題子陵釣臺詩云梅福神仙者新知是婦翁子陵爲  
梅公塢傳記不載詩必有所本

石門瀑布

一派從天下曾經李白看千年流不盡六月地常寒灑木  
跳微沫衝崖作怒湍人言深碧處常有老龍盤

江心寺

兩寺今爲一僧多外國人流來天際水截斷世閒塵鴉宿  
腥林徑龍歸損塔輪卻疑成片石曾坐謝公身

楊柳

嫩葉因風不自持淺黃微綠暎清池玉人未識分離苦折

向堂前學畫眉

贈徐璣

一舸寒江上梅花共別離不來相送處愁有獨歸時去夢  
千峯遠爲官三歲期思君何可見新集見君詩

題桃花夫人廟

一樹桃花發桃花卽是君空祠臨野水何處覓行雲事迹  
樵人說爐香過客焚雨添碑上蘚難讀古詩文

以上芳蘭軒集

徐璣

璣字文淵一字致中號靈淵永嘉人官長泰令有

泉山集二薇亭集四靈之二

初夏遊謝公巖

又取紗衣換天時起細風清陰花落後長日鳥啼中水國  
乘舟樂巖扉有路通州民多到此猶自憶髯公

吾廬

蓬戶閉還開深居稱不才移荷憐故土買石帶新苔藥信  
仙方服衣從古樣裁本無官可棄何用賦歸來

投楊誠齋

名高身又貴自住小村深清得門如水貧惟帶有金養生  
非藥餌常語是規箴四海爲儒者相逢問信音

以上二薇亭集

翁卷

卷字續古一字靈舒永嘉人有西巖集葦碧軒集  
四靈之三

寄遠

秋氣日淒清秋衣殊未成在家猶不樂行路若爲情幾處  
看山色暮天聞雁聲思君有幽夢夜夜出江城

石門菴

山到極深處石門爲洞名嵐蒸空壁壞雪映小齋清果落  
羣猿拾林昏一虎行山僧何所事高坐若無情

冬日登富覽亭

未委海潮水往來何不閑輕烟分近郭積雪蓋遙山漁舸  
汀鴻外僧廊鳥樹閒晚寒難獨立吟竟小詩還

夢回

一枕莊生夢回來日未衙自煎沙井水更煮岳僧茶宿雨

消花氣驚雷長荻芽故山滄海角遙念在春華以上葦碧軒集

野望

一天秋色冷晴灣無數峯巒遠近閒自上山來看野水卻

於水底見青山詩家鼎鑿

句

梅花分地落井氣隔簾生曉千年流不盡六月地常寒瀑

一階春草碧幾片落花輕春分石同僧坐看松見鶴來遊

移花連舊土買石帶新苔吾廬 貴耳集

鸚鵡按四靈詩派中趙紫芝師秀號靈秀入宗室

戴復古

復古字式之號石屏嘗登陸放翁之門以詩鳴江

湖閒有石屏集

姚雪蓬跋式之詩天然不費斧鑿處大似高三十五輩晚唐諸子當讓一

方萬里跋石屏詩清健輕快自成一派

瞿佑歸田詩話載式之嘗見夕照映山峯巒重疊得句云夕陽山外山自以為奇欲以塵世夢中夢對之而不愜意後行村中春雨方霽行潦縱橫得春水渡傍渡之句以對上下始相稱然須實歷此境方見其奇妙

湘中遇翁靈舒

天台山與雁山鄰只隔中間一片雲一片雲邊不相識三千里外卻逢君

白紵歌

雪為緯玉為經一織三滌手織成一片冰清如夷齊可以為衣陟彼西山于以采薇

思家用后山韻



湖海三年客妻孥四壁居飢寒應不免疾病又何如日夜  
思歸切平生作計疎愁來仍酒醒不忍讀家書

淮村兵後

小桃無主自開花烟草茫茫帶晚鴉幾處敗垣圍故井向  
來一一是一家

題釣臺

萬事無心一釣竿三公不換此江山平生誤識劉文叔惹  
起虛名滿世閒

娛書堂詩話嚴子陵釣臺題詠尚矣天台戴式之一絕亦新意可喜

新安寒食

不擬今年到歙州要知行止豈人謀一百五日客懷惡三  
十六峯春雨愁老矣此身猶道路淒其歸夢遶松楸花飄  
仙子無由見千里江山負遠遊

遊九鎖

天柱峯頭一振衣雲開巖路雨晴時登臨欲訪神仙事紀  
實都無漢晉碑拍手數聲龍井躍篝燈一覽洞天奇林閒  
安得棲身處欲煉金丹餌玉芝

毘陵天慶觀畫龍呈王使君

姑蘇道士天酒星醉筆寫出雙龍形墨蹟縱橫奪造化蜿  
蜒滿壁令人驚一龍翻身出雲表口吞八極滄溟小手弄  
寶珠珠欲飛握手掌中拳五爪一龍排山山爲開頭角與  
石爭崔嵬波濤怒起接雲氣不向九霄行雨來萬物焦枯

天作旱兩龍壁隱寧非嬾真龍不用只畫圖猛拍欄干寄  
三歎

烏鹽角行

鳳簫鼙鼓龍鬚笛夜宴華堂醉春色豔歌妙舞蕩人心但  
有歡娛別無益何如村落捲桐吹能使時人知稼穡村南  
村北聲相續青郊雨後耕黃犢一聲催得大麥黃一聲喚  
得新秧綠人言此角只見戲孰識古人吹角意田家作勞  
多怨咨故遣聲音召和氣吹此角起東作吹此角田家樂  
此角上與鄒子之律同宮商合鍾呂形甚朴聲甚古一吹  
寒谷生禾黍

袁州化成巖李衛公謫居之地

一巖端坐挹千峯三兩亭臺勝槩中江水驟生連夜雨松  
聲吹下半年風因思世故吾頭白獨步林臯夕照紅欲吐  
草茅憂國志誰能喚起贊皇公

括蒼石門瀑布

少泊石門觀瀑布明知是水卻疑非亂拋玉雪從天下散  
作雲烟到地飛夜聽蕭蕭洗塵夢風吹細細溼人衣謝公  
蠟屐經行處聞有畱題在翠微

以上石屏集

句

詩談天下事愁到酒樽前秋鶯啼花雨歇燕立柳風微晚  
詩骨梅花瘦歸心江水流城客愁茅店雨詩思柳橋春日  
黃花一杯酒白髮幾重陽九日以上貴耳集

馮取洽

取洽字熙之號雙溪翁延平人

送劉篁磔

來似孤雲出岫閑去如高月耿難攀若為化作修修竹長  
伴先生篁磔山

詩人玉屑

自題交游風月樓

平揖雙峯俯霽虹近窺喬木欲相雄一溪流水一溪月八  
面疎櫺八面風取用自然無盡藏高寒如在太虛空落成  
恰值三秋半為我吹開白兔宮

詩人玉屑一溪流水一聯詩林皆以為秀傑之句

劉正之

正之字子正臨江人

送別趙紫芝

夫君落落天馬姿聲名早與賀白馳錦囊千首不療飢非  
詩窮人窮乃奇憶昔聞君未識面獨傳句法誇清健竭來  
白下一相逢傾蓋論心曾幾見劃然起柁春江流我亦江  
頭尋去舟人生相聚會有別江水江花無盡愁萬事不如  
歸去好石田茅屋生春草如君自是玉堂仙輕車緩轡長  
安道春日遲遲柳依依攀柔條兮送君歸

翰墨大全

上官良史

良史字偉長號闔風山人

尋嚴丹正東潭居二首

愛子東溪幽抱被來同宿山家無膏火然薪代明燭閑窗  
何所有古書三五束鳥棲月上時還見簷前竹

山齋櫺牖疎水月連春霧今夕定何夕清心忻所遇如從  
天姥游似得招提趣幽夢出雲時怱怱山鳥曙

河梁值雨有懷嚴羽

葦岸逢殘雨河橋對暮流倚鞭一悵望客思暫夷猶楓葉  
滿江色夕陽終古愁遙憐君亦苦不共故園秋

以上詩家鼎鑪

晚泊

渺渺復迢迢楓林帶野橋沙寒初上月浦暗已回潮霜葦  
多先折江花或後凋今宵何處雁相伴宿蘭橈

後村千家詩

蘇洞

洞字名叟山陰人丞相頌四世孫有冷然齋集

除夕呈主人

臘節梅花外椒盤淚眼邊山川非故國笳鼓咽新年機事  
鷗偏覺家書雁不傳細箋今夕恨萬一故人憐

錢塘渡

百年鬢髮春風晚十二闌干落照微多事錢塘江上水送  
人離別送人歸

以上詩林萬選

金陵

朱雀街頭觀闕紅角門東畔是春風人家一樣垂楊柳種  
入宮牆自不同

詩家鼎鑪

嚴羽

羽字丹正一字儀卿邵武人自號滄浪逋客有滄

浪吟

滄浪詩話論詩如論禪漢魏晉與盛唐之詩則第一義也大歷以還之詩則小乘禪也晚唐之詩則聲聞辟支果也盛唐諸人惟在興趣羚羊挂角無跡可求故其妙處透徹玲瓏不可湊泊如空中之音相中之色水中之月鏡中之象言有盡而意無窮近代諸公乃作奇特解會遂以文字為詩以才學為詩以議論為詩夫豈不工終非古人之詩也蓋於一唱三歎之音有所歉焉國初之詩尚沿襲唐人王黃州學白樂天楊文公劉中山學李商隱盛文肅學韋蘇州歐陽公學韓退之古詩梅聖俞學唐人平澹處至東坡山谷始自出己意以為詩唐人之風變矣山谷用工尤為深刻其後法席盛行海內稱為江西宗派近世趙紫芝翁靈舒輩獨喜賈島姚合之詩稍稍復就清苦之氣江湖詩人多效其體一時自謂之唐宗不知止入聲聞辟支之果豈盛唐諸公大乘正法眼者哉

荅友人

湘江南去小人行瘴雨蠻烟白草生誰念梁園舊詞客桃  
榔樹下獨聞鶯

閨怨

昨夜中秋月含愁顧影頻空留可憐影不見可憐人

懊儂歌

君子如白日願得垂末光妾心如螢火安得久照郎  
船在下江口逆風不得上結束作男兒與郎牽百丈  
朝亦出門啼暮亦出門啼蛛網挂風裏搖思無定時

喜友人相訪擬韋蘇州

朝朝竹林院閉戶讀殘書几閣晨風入荒郊寒露餘故人  
步屨至清坐喜踟躕輟卷還畱興漱泉同飯蔬

霏雪錄嚴滄浪之于詩刻意古作卓然不為流俗所染五言如閨怨等云

廬陵客館雨霽登樓言懷寄友

終日坐汾澳邈然無少欣登樓一周覽始見萬山羣微雨  
洗殘暑青天卷浮雲襟懷兩廓落朗若見夫君見君君何  
在顧影還獨笑吏非金門游隱異滄浪調江明秋月白山  
空夜猿嘯徒事百卷文未返一竿釣畱滯豈勝愁非君誰  
與謀水寒終赴海鴈遠暫賓秋舉世不可語猶當傲巢由  
贈君三尺劒永駕五湖舟

山居卽事

稍欣入林深已覺煩慮屏霜果垂秋山歸禽度風嶺紛紛  
葉易積漠漠雲欲盛礪戶寂無人松蘿窅然暝唯聞山鳥  
啼月出柴門靜終歲寡持醪延歡聊煮茗羣書北窗下帙  
亂誰能整

還山吟畱別城南諸公

日暮望寒山惆悵歸思發如何山中客歷看城頭月山中  
月明女蘿秋石磴潺湲寫碧流巖猿久別應惆悵澗鳥相  
呼亦共愁城南故人與我好令我忘卻歸山道昨夜西風  
夢到家忽驚千嶂之花老朝來舟子促辭君回首空江語  
尚聞別後莫嗟難見面相思只望嶺頭雲

懷南昌舊游

昨在南昌府清遊不可窮杯行江色裏棹進月明中樓笛  
吹晴雪菱歌漾晚風坐來懷舊迹萬里亦飄蓬

訪益上人蘭若

獨尋青蓮宇行過白沙灘一徑入松雪數峯生暮寒山僧

喜客至林閣供人看吟罷拂衣去鐘聲雲外殘

客中別劉表叔季高

悠悠遠別半生悲白日相逢又語離海內風塵驚不定天  
邊消息到何時洞庭旅鴈春歸盡瓜步寒潮夜落遲惆悵  
孤舟從此去江湖未敢定前期

和上官偉長燕城晚眺

平蕪古堞暮蕭條歸思憑高黯未消京口寒烟鴉外滅歷  
陽秋色雁邊遙清江水落長疑雨暗浦風多欲上潮惆悵  
此時頻極目江南江北路迢迢

以上滄浪吟

嚴仁

仁字次山號樵溪邵武人有欵乃集

塞下曲

漠漠孤城落照閒黃榆白葦滿關山千枝羌笛連雲起知  
是胡兒牧馬還

詩林萬選

平遠樓

湘中病客思歸日城上高樓獨倚時半樹夕陽鴉集早一  
江秋色雁來遲

詩家鼎鑪

嚴參

參字少魯自號三休居士與丹正次山齊名世號

嚴

梅

衣染龍涎與麝臍裁雲剪月作冰肌小瓶雪水無多子只

蓼橫斜一兩枝

後村千家詩

看雪

天遠正難窮樓高不堪倚醉夢入江南楊花數千里

詩家鼎

嚴 肅

肅字伯復號鳳山

落花

片片落花飛隨風去不歸如何臨欲別不得傍君衣

詩家鼎

羅之紀

之紀字國張高安人嘉定中孝感尉

句

吾道非耶真可恥此君豈是折腰人

西江詩話之紀尉孝感攝邑雲夢上官不為禮之紀因雪壓竹賦詩云云遂棄官歸

蕭彥毓

彥毓號梅坡楊誠齋有句跋其詩卷云西昌有客

學南昌蓋西昌人也

西湖雜咏

花心亭上坐滿眼是湖光只為便幽趣能來倚夕陽水邊

春寺靜柳下小舟藏不待清明近鶯花已自忙

梁家渡

遠水環沙翠作灣紅塵飛不入青山涼風一枕秋宵夢夢

繞千巖萬壑閒

清明日早出太平門



江頭楊柳暗藏鴉江上鵝兒浴淺沙早起一風如此惡路  
旁落盡刺桐花 以上詩人玉屑

吳 錡

錡字信可永福人鄱陽張世南與定交僅百日而  
卒世南悲悼之錄其一詩

遊永福方廣巖

曾訪神仙巖洞來人言偉觀似天台藤蘿足下猿猱嘯鐘  
鼓聲邊日月開燈續佛光凝紫翠雲將蜃氣作樓臺最憐  
貫石神龍尾猶帶天東雨露回 游宦紀聞

胡時可

稼軒命賦滕王閣

滕王高閣臨江渚帝子不來春已暮鶯啼紅樹柳搖風猶  
似當年舊歌舞

隨隱漫錄辛稼軒觴客滕王閣詩人胡時可通謁閻人辯焉呵嘗愈甚辛  
使前日既稱詩人先賦滕王閣有佳句則預坐卽題首句衆大笑再書云  
云迺相與宴而厚賜之

彭 止

止字應期崇安人自號漫者有刻鵠集

題辛稼軒齋中

棊子聲乾案接塵午窗詩夢煖於春清風不動堦前竹誰  
道今朝有故人

建寧府志彭止詩筆甚高嘗謁辛棄疾值其晝寢題一絕于齋而去稼軒  
覺遣人追之延畱累月

左次魏

跋誠齋論高廟配享書橐後次伯子韻

鑿坡蓬監兩封書道院東西各付渠乾道聖人無固必是

非付與直哉魚鶴林玉露

史文卿

文卿字景望鄞人

種梅

呼童耕雲種瑤樹斗挂青冥下風露隔林野鶴不知寒爲

飛來復飛去

素與梅花自有緣又移幾本種庭前鏡中一半閑風月不

屬王郎載雪船

秋詞

寫就秋詞雁影稀背燈無語獨眠遲畫闌點滴芭蕉雨一  
夜將愁向阿誰

枯梅

樛枝半著古苔痕萬斛寒香一點春總爲古今吟不盡十

分清瘦似詩人以上前賢小集拾遺

黃洪

絕句

龍舟大半沒西湖此是先皇節儉圖二十六年安靜裏權

歌一曲在康衢

四朝聞見錄張巨濟字宏圖福清人嘉泰間上書寧宗以慈懿攢陵今在  
湖曲若陛下游幸則未免張樂此豈履霜露之義寧皇感悟其言旋轉一  
秩由此湖山遂無清蹕之聲御鵠至沈于波臣非特儉德也黃洪詩云云  
武林舊事茂陵在御畧無游幸之事西湖離宮別館不復增修黃洪詩云

云

余良弼

良弼順昌人

教子詩

白髮無憑吾老矣青春不再汝知乎年將弱冠非童子學  
不成名豈丈夫幸有明窗并淨几何勞鑿壁與編蒲功成  
欲自殊頭角記取韓公訓阿符

萬姓統譜良弼子大雅與游敬仲同時從朱子游深得求放心之旨兩捧  
鄉書良弼有教子詩云云

宋詩紀事卷六十三

宋詩紀事卷六十三

